

Gvangjsih Hai Hoih Bwhhoenx Gaiq Daihcibngeih Aen Yindungvei Dijyuz Cienzdoengj Siujsoq Minzczu Daengx Guek

Bonjbauq siusik (gicej Cau Dwzfeih) 6 nyied 28 hauh, Swcigih Minzczunghvej, Swcigih Dijyuzgiz youq Nanzningz Si hai hoih doicaenh Gvangjsih bwhhoenx gaiq daihcibngeih aen yindungvei diyyuz cienzdoengj siujsoq minzczu daengx guek (lajneix cwnnguh gaiq daihcibngeih aen yindungvei minzczu daengx guek). Aen hoih cienzdaengz hagsib le gij cingsaenz hoihcouzbi baez yindungvei neix, gangj geizgonq Gvangjsih guh le gijmaz hong, guh ndaej baenzlawz yiengh, caiq baijbouh hong baezlaeng. Boux dangicuj suhgi,

boux cujyin Swcigih Minzczunghvej Lij Cinlinz, boux dangicuj cwnngyenz, boux fugizcangj, yizgiz sinzsiyenz Swcigih Dijyuzgiz Luz Yivwnz camgya aen hoih caemhcaiq gangjvah.

Aen hoih yinxok, cujiz camgya aen yindungvei daengx guek gvancez guhsaed le gij swhsiengj youqgaenj gvendaengz gyagiengz caeuq gaijndei hong minzczu Siz Ginbingz cungj-suhgi, doicaenh hwnqguh aen gih guhyiengh couqmaenh gij eijsik caezcaemh Cunghvaz Minzczu, coicaenh hwnghfat saehnieb daengx biengz lienh ndang. Aeu haeujlaeg

roxnyinh daengz gij cwnngi iugouz yunghcawq caeuq yihi youqgaenj camgya doxdax, rox daengz camgya doxdax dwg sawjmingh, yaek dawzrap, cagaenj guh. Yaek ciuq gij iugouz couqmaenh gij eijsik caezcaemh Cunghvaz Minzczu bae guhhong, camgya doxdax cix ndaej coicaenh gak minzczu "samgyau", cauxbaenz aen ranzmbanj cingsaenz caezmiz Cunghvaz Minzczu. Yaek baengh baez hoih neix, langhbaij gij cingzcik baenz mboengqneix Gvangjsih hwnqguh aen gih guhyiengh couqmaenh gij eijsik caezcaemh Cunghvaz

Minzczu, yienh'ok vunzlai gak minzczu youq seizdaih moq miz aendangj dazyinx, caez hwnq ranzmbanj gyaundeih, caez cauh ngoenzcog ndei raeuh.

Aen hoih daegbied gangjnaeuz, aen yindungvei neix mbouj daengz haj ndwen couh haimuq, gak aen danhvei, gak aen doih aeu nyinhcaen cujiz, gaenxmaenx bwhhoenx, aeu biucinj ceiq sang, iugouz ceiq yiemz, fuengfap ceiq mizyauq bae sonlien, roengz-rengz saedyienh aen muzbyauh "cingzcik doxdax caeuq cingsaenz vwnzmingz song sou lai".

Cunghsanx, Gunghcwngz Song Dieg Guh Hozdung Yinzda Hamj Si Doxgyau Doxgap

Mboengqneix, Gveilinz Si Gunghcwngz Yauzczu Swciyen Yinzda Cangzveijvei daengz Hocouh Si Cunghsanx Yen guh hozdung yinzda daibyaui hamj si doxgyau caeuq gyauiuz minzczu doxgiet baenaj, song mbiengj caemhcaiq ciemdingh hezyi doxgap.

Song dieg yinzda daibyaui ngonzyawj le Aen Dieggiek Ndaembyaek Gunggangj Gungh'anh Cin, Aen Suen Gunghyez ndaw yienh, Aen Suen Canjnieb Swngghuz Dunghyungz Gvangjsih(Cunghsanx), doxhag gij guhfap ndei bae hwnqguh aen camh ciepgyaeuj, aeu rengz yinzda bang hwnghfat canjnieb, guh minzczu doxgiet baenaj daengj.

Song mbiengj caemh gangj daengz gij vwndiz vunzlai song dieg cungj gvansim haenx, lij ciemdingh 《Aen Hezyi Yinzda Daibyaui Hamj Si Doxgap》, Cunghsanx Yen Liengjanx Yauzczu Yangh Yinzda Cangzveijvei, Gunghcwngz Yauzczu Swciyen Sanhgyangh Yangh Yinzda Cangzveijvei cix ciemdingh le 《Aen Hezyi Yinzda Daibyaui Hamj Si Caez Hwnq Aen Camh Ciepgyaeuj》《Mbaw Hezyi Hamj Si Caez Guh Minzczu Doxgiet》.

Baez hozdung neix coicaenh yinzda hamj dieg doxgap baenz rengzmbwk, doicaenh hong yinzda hwnghfat youh ndei youh vaiq.

(蒙秋萍/Mungz Ciuhbingz)



▲ Gij bouxyienj Nanzningz Si Minzczu Vwnzva Yisuz Yenzgiuyen biujyienj heiq Gvangjdungh 《Ciengj Aendig》.

Gaiq Daihroek Ciet Vwnzva Faexcuk Va' ngaeux Youq Nanzningz Haiguh

Bonjbauq siusik (gicej Veiz Yingjcinx dunghsinyenz Luz Cinhhungz) 6 nyied 29 hauh, "faexcuk va' ngaeux soengq rumz liengz, seuqcingh hen simnduj" gaiq daihroek ciet vwnzva faexcuk va' ngaeux youq Nanzningz Si Swhsanx Gunghyenz haiguh. Baezneix miz vwnzyi biujyienj, heiq Gvangjdungh heiq Nanzningz, daenj buhvaq gyaue byaij daiz, goeng'ik hwnj dangz goq gohbuj daengj hozdung lai yiengh, yinx daeuj haujlai vunz ngonzyawj daejniemh.

Gyoengqvunz bengx yawj gingjsaek ndei bengx gamjsouh gij yienghndei vwnzva cienzdoengj Cunghvaz.

Aen ciet neix daj bi 2019 guh daengz seizneix, yienh'ok Hinghningz Gih hwnghfat vwnzlij doxyungz ok cingzcik, guh ndaej baenz. Baez hozdung neix yaek guh daengz 7 nyied 21 hauh, duenhneix lij miz hozdung yawj bingh mbouj sou ngaenz, lwnhgangj labsab faenloih, goeng'ik hwnj dangz goq va' ngaeux boeb ceij, hai aen haw vwnzva daengj.



▲ Bouxgagnyienh youq henzdah beuj nyapnyaj, canj bamhboem.

Mungzsanx Guh Gagnyienh Fugsah Coux "Caet It"

Mboengqneix, Vuzcouh Si Mungzsanx Yen laebdaeb doek fwn hung, raemx Dahmeigyangh hwnj sang. Raemxrongz roengz le, ndaw yienh baihbaek, diuz roen henzdah cungj dwg doemngawh, nyefaex, gaeugyaz, vunzlai byaij roen gig mbouj bienh. 6 nyied 29 hauh, Mungzsanx Yen Baujbu Hezvei

Dangcicuhbu caeuq Sezyingj Hezvei Dangcicuhbu doxcaez guh hozdung gagnyienh fugsah. Gyoengqde ciu le 40 lai boux dangjyenz caeuq veiyenz daengz henzdah canj naezngawh, beuj gaeugyaz, canj nywj, aeu saedguh coux "Caet It" ngoenzseng aendangj.

(黄胜林/Vangz Swnglinz)